

北

游

錄

北游錄序

義烏朱之錫撰

鹽官談孺木年始杖矣同詣長安每登涉躡屨訪遺跡
重趼累鹽時述徑取道于牧豎村傭樂此不疲旁睨者
竊哂之不顧也及坐窮邨口對一編掌大簿踞手嘗不
輟或覆故紙背塗鴉紫蚓至不可辨或逢聽辭窺軼事
緒聞殘褚圯碣就目目所及無遺者其勤至矣累月以
往積若干牘曰紀程則得之津舫曰紀郵則得之傳舍
曰紀咏曰紀文曰紀聞則于役于處兼焉孺木之於游
亦侈矣踵剖其目脫酬其踵邀天之幸不為不厚一行

游歲筆飽墨酣化蓬萊為賜履化荆緱為子墨此外尚
不知有燕市酒人况其餘乎孺木目云疑種種矣幸一
當長安酒後耳熱不擊筑拊缶猶屈首研索作指大狀
抑文士結習深重非路鬼所能揶揄者或曰馬少游乘
下澤車御款段願為鄉里善人無他望孺木名不出少
閑忘期五岳於北游發軔自而孺木生晚假譚天之衍
炎轂之髡獲值今日知聽記其旁當恢奇闊博倍時流
而百之餘尚恨茲錄之僅僅也

北游錄序

談子曰余于北游而重有感也記壯歲癸亥客構李夢
北游陸走山東經涂之西里許有完數椽入之意若故
居似夙生善田年二十七而大春屬並在寤而大異之
因歎根器簿劣今安得踰量而躡進之哉丙寅客吾邑
徐氏與道力連席又夢座上同杜子美王百穀嘗問百
穀親寢時見其偉暫私疑之旦以語道力道力方年少
桃達遽曰果如兆使汝文而不貴子猶腸肥腦滿直胡
盧其說自後終坎壞求作魚蠹無他望陽城張藐山先
生一見白下曰子大類北人夫生於南而性于北在他

人當受僉荒之愠余獨幸先生真知我者於癸亥之夢
昭合今癸巳未燕再改歲矣才不堪僕事子義百穀而
託身草堂給札東閣髣髴近之往日飢饉視天寶貞元
何如也嘗避鄉寇幸脫虎口百穀咏紫牡丹受知表文
榮起名余無似得一當長安幸矣片鷁大鵬一也游河
擇馬藍關微子弓紮馬目闕于元珍到海驗於平叔藤
陰感于少游懸契在前合符在後英流上哲往往如此
以余之瞽眊而非意所及愧膺于三十年之上人生出
處豈偶然哉豈偶然哉故余北游而重有感也

北海錄 紀程

鹽官談遷孺木著

余結髮期一當於燕既棄縵無戶外之履竊自恨少
壯時耽司馬子長或一緇一笠度幾旦暮遇之間以
告友人浸假有食言之懼過不自量附驥千里則邀
惠於義烏方舟而北紆津微古十得一二昔者周公
作里鼓不迷遠道今其制佚矣余代之以側理非足
存也博奕猶賢唾壺欲闕執途之人而問之雖在桑
榆於玩白惛月其末之散出致紀程

癸巳

閏六月甲子朔客嘉興先是夏四月義烏朱梅麓太史
弘文院編脩服闋有長安之約因會武林請謁於樞李
而太史未至門人包令瑞瑤昭家周里街之東偏下其
榻數夕矣宿澹永齋

己巳朱太史泊嘉興北門

庚午薄暮太史以東至

辛未昧爽入東門別梅溪李楚柔鳴錄沐我飯我返包

氏酒數巡以輕舫登北門之舟如浮屋則訪朱方庵昇
於楞嚴寺值海鹽俞君升雪來共攜錢太史舟中燭跋
而別仍作家報不勝黷然太史貽三十金託方庵為郵

夜熱不甚寐

壬申辰刻解維五里杉青間其右羞墓為漢朱買臣婦
買臣墓在月里街東塔寺內又夏邑縣東南三十五里
亦有墓二十七里王江淫舊鉅姓王氏江氏居此其絲
衣被天下大賈鵲集阻風而泊夜改榻始安

癸酉枕上聞榜人云欲雨方為旱農幸起視仍杲杲也
三十里平望鎮吳江縣吳淞分界有驛門榜入浙第一
程市多壁而西南鶯脰湖以形似名唐張志和釣魚處
源自天目至荻塘會烟溪水併出平望安德橋滙於此
其東南汾湖一曰汾湖界吳江嘉善二十里八尺鎮壓

無亮室相傳 明憲廟安妃姚氏家貧習緝緝貿市目

不忤視應選入宮髮素種種不盈尺登舟過平望一夕

髮長委地今地名八尺見馮夢禎嘉興志中按宋陸游

入蜀記過平望二十里曰八尺則前說妄也地產銀魚

土人暴之為脯貴纖白二十里泊吳江縣北馬頭宋天

聖初平江府通判建安徐爽自嘉興市涇至吳江赤門

石橋九十餘里築隄繕橋今嘉興之橋道侵削杭人至

沒脛入吳江完整昔丙戌北兵大至役杭嘉人治馳道

可並五騎凡完墓稍礮俱撤之岸水版築尤苦曹幾何

時第廢惜哉又崇禎戊辰秋游虎丘經吳江城西門晚

走東門之長橋袤千餘尺登垂虹亭詰朝渡太湖浩瀚
無際幸已後委涉吳江直城之東折行從運河焉又吳
江城南方塔其巔云與吾縣長安壩等水勢窪隆迥別
如此故吳易潦杭易涸蘇州舊名平江謂地下與江水
平也宋慶曆二年築隄便運截江流五十里致太湖水
溢而不泄僅於寶帶橋分勢下通吳淞

甲戌曉望西山致有爽氣二十里尹山橋橋左一培塿
目九里 寶帶橋唐元和中州史王仲舒築石隄通運
亘數十里隄外吳淞江內為澹臺湖捐帶建橋橋洞五
十有三澹臺滅明南游家於此後陷為湖吳縣西南十

八里經艣塘俗云鮎魚口十里抵蘇門對門之減渡橋
歷盤門胥門多丘墟瓦礫往過城下中丞某里其城不
備衣衾竊為哂之城濠即夫差歸帆涇也未刻汨閭門
金昌繁麗不減於昔聞書肆收四十餘部朱太史曰蘇
杭金陵外鮮書肆矣

乙亥微雨霽霽朱太史午隙欲游虎丘從吏之贊一舟
經丰塘道拂成列不似髡我西湖也酒數行及山下並
葛衫荊履導隸喋聲夕陰吹涼眉宇生綠自生公石劍
池鶴澗而上登靈巖寺遙轉廡旋領畧幽曠返而村官
建德朱氏酌太史臨流披襟余輩為不速之客錢塘黃

文甫宏憲師天主教諱日家言詆儒一行郭守敬之學
為未至余素苦觴政以太史知我免於濡首席散漏盡

二刻

丁丑錢塘裘東皇龍來同北上

戊寅過裘東皇舟中見黃文甫銅簡儀如鏡徑五寸綴
珠為北極中亘幾衡垂以絲節候星經分面可攷第鏤
列纖毫須離婁之目余不能辨是日立秋

己卯陰苦暑累日不出崇禎甲申冬膠州高相國弘圖
解紱僦居姑蘇城隍廟之南明年二月余過之常熟毛
子晉邀相國於虎丘同雲間朱太僕國祿吳人徐元

歎波僧石林橫舟對月進河豚相國不著太僕年七十
五善容城邵老之術無夕不由語鄙熟石林善鑒墨刻
明日相國出淳化閣帖俱硃筆旁注云文衡山似未然
尋別相國四月終相國趨杭州五月終趨紹興閏六月
相國絕粒卒姑蘇僦宅度仍屬王氏欲過之不能作襴
襪徒切西州之慟

庚辰熟甚朱太史子不善乳僦居下津橋毛氏所便醫
辛巳晚眺於下津橋不異蘭臺之風是夕舟人為太史
子祝釐演劇余登飲頗酣或言閣門無蚊余曰否否連
柱其口已闕馮元成集閣門沙盆潭無蚊松江金沙灘

亦無蚊悔問之臆答

壬午游戒幢禪院徐中書青芝菴捐別業以滌金谷之
習右葬茂林祇和尚稠柏廣隨同於北邙彼尸陀林不
若是也

癸未是日吳人賽司疫之神士女駢舟如溱洧午同友
人乘舴艋而西望王文肅相國墓道問其堂斧尚遠自
楓橋北入慈泰寺則舊王路禪院也萬曆中常侍張隨
建賽者最焉儀仗供帳導神以出及於城隍肩踵摩接
不之耐遂入寒山寺寓成主益器江村漁火唐李猶佳
筆之場非如今劇市也返同朱太史於門觀賽者多角

觥之戲時總戎王煥樓船泊下津橋西蒼頭彈一十歲
女損目一老人破腦

甲申早同范沈二生問道趨虎丘田間植菱茨菰芋
薺交蔭蔚蔚良苗芄芄惟雨是渴半塘多新祠如土巡
撫國寶且譴死何祠為有嚴烈婦顧氏墓以救夫自刎
者徜徉虎丘間沈生呼茗酒俱再從虎丘橋而西中道
值雨濡其衣行里許則土燥諺所云夏雨分牛跡也
乙酉卯刻始發舟五里楓橋新隄甚壯以風逆挽之強
詩云汎汎揚舟緇纒維之緋絳也大索也纒綏也其挽
舟之始乎二十里許墅戶部權舟於此昔余輕艤通刺

關使者而過之今苛細不堪矣村官朱氏仍餞太史侑
以買姬似琴操入道之年而善酒酣別改唐詩燭下姑
蘇望雨泥輕塵客路青青笛色新勸君更盡一杯酒北
出吳關幾美人

丙戌晨起望西南諸山其最高曰穹窿山幕以雲或雨
微而無如旱魃何也二十里望亭鎮往夾河環閘今左
岸葦舍屠沽者數家耳二十里新安鎮三十里無錫南
門自潞墅來隄不以石

丁亥早泊錫山驛至鄒氏放生池柳浪游鱗誘以炊餌
吟唱相向踣後同朱太史游慧山舊名九龍山費一舟

周公瑕 天球所題青雀舫也小飲登陸故學憲鄒愚公
迪光石坊當其徑曰山靈人傑意學憲未足副之第二
泉出石穴方欄丈許汲未絕筴前為漪瀾堂長沙李東
陽書有碑刻詩二首大書正德巡撫豫章某立名氏劇
去或李士實以黨叛故磨去之耶稍南入樛里鄒氏園
脩廡曲池綺閣涼臺在在而有大都以土木勝其題額
並傷巧惡公以全力飾之今多易主瓜分而五之金谷
平泉何足恨哉樛里即古之春申礪過患山寺不入問
二泉書院亦李東陽題門徑雖覺邵文莊賢遺風不遠
則鄒氏金注者拙矣慈山北連錫山惜未以一節收之

遂舟太史運泉六十畧嘗將氏酒甘而不冽舍之間之
揚子江水惠山泉一升俱重二十四銖濟南城內舜祠
西杜康泉二十三銖無錫西門外梁溪源出慧山與運
河合北門迎潮館下即蓮蓉湖今多堙

戊子晨發十五里潘豐鎮五里洛社橋左壩而右屋凡
鄉落類然十二里五木鎮十二里橫林鎮市民尚數百
家通雜販十里戚墅堰堰左戚氏櫛比也運河自鎮江
至杭州相傳隋煬帝鑿濟寧楊太史士聰於戚墅堰讀
遺碑云戚墅支河自六朝已有之此言必有所據夫使
運道未通而先有支河此涓涓者將何所歸則知自古

而然非自隋始也或曰而濬之耳余接禹治水於吳則
通渠三江五湖其來久矣夫差鑿邗溝以達江淮加濬
江北豈蘇常近地轉饒齊楚猶不為通漕乎六朝都建
康凡三吳船避京江之險自雲陽西城鑿運漕徑至都
下隋廢二瀆大業末穿京口至餘杭八百里或深廣或
鑿治泰之百目戚堰而北土坡蜿蜒循常州城南折行
夾岸如複嶺且十里泊西門之毘陵驛

己丑陰入常州城門閑林立閭閻勤儉各坊供龍神襍
早午放舟十里新開泊奔牛鎮相傳梁武帝

有人於石城掘得一僧瞑坐土中奏於帝以問詔公曰

此入定目可於旁擊磬則出定矣試之果開目問之不
答誌公乃語其前事云云其僧一視誌即南奔遁逐之
坐地化為牛故因以名一曰漢時金牛出茅山奔此今
置閭不閉按武進縣西北彭山岡阜相屬數百里有齊
高帝泰安陵意古人治渠遺蹟也夜微雨

庚寅行二十里呂城吳呂蒙嘗築此屬丹陽其地饒於
奔牛今齊同市門多塞僅圭竇以避驛驛河中壘石左
右置閭五十里泊丹陽縣是日陰夜微涼南門對河石
碑四一宣尼蒙馬庠有吳延陵季子之墓一尹和靖一
石曼卿一韋侍中皆墓碑江左丹陽尹治在金陵非京

口

辛卯發丹陽危岸數十尺如九折坂故一曰曲阿經練
湖石開晉陳敏引長山之水滙為練湖周有二十里石
閘八湖水釀酒色白味甘十五里張官渡逆流舟不即
前渡口居民數十家榆在門綠陰交映十八里黃泥
壩隄孟峭河流如壑高原之菽幹不隕尺十八里新豐
鎮稍殖殖十里獨山積土濯濯落照如畫丹陽令安陽
英之謨出朱太史之門被劾方解組來謁太史言治狀
其脩石閘費千六百元誠整整且舉卓異以賦誥被劾
則保障不如鹽鐵也亡何野泊同太史飲頗醉

壬辰行十里丹徒鎮秦始皇東游以此有天子氣使諸
衣徒鑿龍目湖中長岡使斷岡改名丹徒今水北注江
通潮潮方至挽舟而爭邪許如沸 橋左天樞廟祀

漢留侯道家崇奉之舊鄞縣沈文恭一貫題楹不及訪

道中華氏園竹樹峭森彼素封不傾於亂亦足多也丹

徒北沃村舍完潔二十里泊鎮江西門間丁卯橋在城

南三里晉元帝子宸鎮廣陵丁卯日建今過其處惜未

能問耳入城東經千秋橋至月華山城隍廟踞其陽稍

北登公館之萬歲樓晉刺史王恭建按公於黃鶴山西

南創萬歲樓西北創芙蓉樓俗傳此樓飛向江外以鐵

鎖縻之樓上時見白氣如煙刺史必喪輕者貶若見紫
氣則進爵唐詩芙蓉紫氣滿西樓又江上巍巍萬歲樓
今守劉芳烈新修遐矚江山頓起六朝之感

癸巳舟人樹檣為避同同范生西走陽彭山出田間循
壘而上東岳廟唐天祐間大夫周敬福建廟貌觀窈周
氏裔世守之云宋丞相必大 明初尚書啓新洪武十
九年成楚雄衛改都勻譚牒誥勅猶存門內亭八角穴
其瘠脊以透木香此花之析楊也重階南出為達稍西
洪山寺門左多修竹惜刊句題名塙此君墨刑殿供水
陸神像若干幅正德十五年内官繆瑾募繪於南都者

又稍西入凌雲寺庋小僧云本智果院唐時十八羅漢
夜現光從寶蓋山凌雲去其二寶蓋在寺西南土阜耳
遂陽彭之北麓入藏佛寺其地宜眺江而特垣隔之可
咲也尋午飯則有北園之游循西門而北京口驛旁楊
文襄一清祠東出委巷走田中避雨村舍少頃登甘露
寺吳甘露中建脩廡數千尺陟凌雲亭裸坐作天際真
人想右多景樓尤雄適閱碑記云樓一曰春秋一曰玩
江既俚甚又云樓下有潭曹瞞題以秋月夫孟德南征
在濡須非京口也山北支河通江豈秋月潭耶孫劉走
馬碕在秋月潭右山北下石室中貴人生祠游人詩刻

往往刺目寺南徑直而峭如危脊可數百武土山旁屬
意未蒂海岳庵遺址緣磴而下得鳳凰池 明高皇帝
所幸又孫劉試劍石頑礪鼎分外為演武場甲申鄭都
督鴻達鎮京口環山而柵今求其彷彿不復得矣莫雨
終夜未止

七月甲午朔未刻雨霽

乙未朱太史招吳丹陽游金山晡刻同棹輕濟汨汨有
聲秋江澹冶佐我浮白及岸僧導從石門則蘇學士解
玉帶處稍西龍游寺 明遼王題額其第一泉僧井以
欺人剝之劣登塔躡一級苦汗而止呂仙閣勝覽空拔

妙高臺不如也妙高臺奉蘇子瞻僧佛印二銅像崇尺
許面龐俱肥側席跪對如聆聲咳而臺外偏東又學士
祝柳庵矣順濟龍王廟韓世忠伏兵墮兀朮處傍祠世
忠當肖兀朮像其下為快順治初梨園演麒麟傳奇至
兀朮哀告轅門改肩輿睨狀主席不以為然又弘光
元年吏部侍郎德清蔡奕琛入相於翰林院開宴末劇
則兀朮哀告轅門也人事不修妄相矜詡長江果天塹
耶時兵部郎楊文驄孫金山而城之費萬餘緡棄之如
敝屣至今有遺甃馬山左善財石山右郭璞墓中冷泉
出其下近若咫尺風濤擊撞望而神慄長洲陳明卿先

生仁錫嘗三過其墓有泉泓然或題曰卧影金山鏡詩
徧壁有漢壽亭侯畫墨竹一枝亦神所授也階城白石
出香山距鎮江四十里金山以大江勝而六代時無
間今刻畫極矣使山璽悔黥剝而返混沌愚公且移之
矣遂飲於丹斜暉迅颿各相別

丙申早起沿江三里曰銀山多叢祠左曰補陀巖其下
壘石為門曰昭關按戰國策伍子胥橐載而出昭關夜
行而晝伏至於菱夫菱夫索隱云漆水也無以餌其口坐於行蒲
服乞食於吳市昭關在和州界距全椒二十七里又歸
德府城東南三十里亦曰昭關子胥渡江東走吳當徑

和州今京口其走姑蘇道也門傍石壁刻饒銛孝血字
崇禎二年後學吳成學為伍師立以事問土人不能對
豈即子胥事耶或今人因伍氏例見之也至西津渡京
口舊名須口即西浦也瓜洲直其北玉山据江胥立江
水湯湯不風而怒玉山寺之門一曰避風館瓜洲館亦
如之並以急泊稍左危巖千尺上有神祠祠下重階曰
朱煙亭蜀人雷起劍立吞吐波光縹緲無際然因金山
而銀而玉其汰已甚石衛尉以財累竊為山靈祟之南
半里蒜山奉石戍削上設片堠北魏蕭至瓜步宋文帝
遣司馬到元慶寺守蒜山諮議參軍沈曇慶守北固尚

書褚湛之先行京陵仍西陵 明星皇帝追敗漢人於
此太倉吳駿公先生蒜山懷古有滿江紅詞沽酒南徐
聽下雨江聲千尺記當年阿童東下佛狸深入白面書
生成底用蕭郎展展偏輕敵笑風流北府好談兵參軍
客○人事改寒雲 舊壘廢神鴉集儘沙沈浪洗斷戈
殘戟落日樓船鳴鐵鎖西風吹盡王侯宅任黃蘆苦竹
打荒潮漁樵笛仍過銀山稍南金瓶山卑小其上殘碑
為元學田記碑陰隆慶戊辰仙居吳時來題曰水探亭
山下潮音洞斗穴耳午飯訖又越陽彭而西十里大峴
山秦始皇發輜衣所鑿京峴也小憩於茶庵又南里餘

曰小九華萬曆初里人周棟棄家事地藏佛開山以代
池州九華者規制軒翥間招隱鶴林二寺云近之東出
逶迤披莽甚苦而反畏渴不畏步也是日吳丹陽貽扇
幣辭

丁酉使附家問宜興陳編脩實庵于飛來餞朱太史示

趙子昂真草千字文同閱實庵極言巡臺李成紀之綏
靜如高郵告訐至閉城絕人跡李至焚牒不問人始安
趙氏墨蹟太史和以為贗筆午祭江阻風泊蒜山

戊戌己刻微雨午大風同泊金氏義馬舍漢惠己丑進
士任廣西右江道右叅議駐柳州壬辰七月城陷八月

至桂林十月入，十一月遇害以喪遂明年任光祿寺卿

己亥已刻乘風渡江十五里即瓜洲立鵠首縱目超忽
順流楚蜀收於一帆吾輩不能擊楫中流猶當橫槊賦
詩也舊瓜洲村為揚子江之沙磧沙漸長其狀如瓜子
接揚子江居民萃焉唐為鎮今立城稱要地上下二閘
始極挽力俄風甚逆引鱗吳夫差將伐齊築邳城下掘
溝為邳江自江東北通射陽湖西北入淮通運隋大業
初發淮南民十萬開之自山陽至揚子江吳隋雖輕用
民力今漕河賴之西門豹曰今父老子弟患苦我百歲

後期令子孫思我諒哉晚大風雨道汜瓜洲運河至揚
子橋東西分注一向儀真一從瓜洲入揚州故名三汊
河隋大業十三年大駕出揚子江臨江宮至唐始積沙
至二十五里開元中潤州刺史齊澣濬之曰伊婁河或
即此河耶夜雨

庚子晴舟趨揚子渡即揚子橋舊縣也李白詩揮策揚
子津元世祖至元二十八年七月己未移揚子縣治新
城辛卯渡右建塔今五級未竣久之泊揚州廣陵驛同
友人問渡東入福緣庵今福國院僧德宗明遣住二十
年拓之傑閣重樓縑素雲集好談休咎實忌今五月武

司理續緒杖死云出巡臺李氏意足傲游袖矣庵左故
少司馬樂平范公鏐祠范嘗任兩淮都運諡曰鹽政矣
廢公未達鹽政吳興逢我公又曰范來早我人飽范來
遲我人饑見萬曆辛丑揚州志今裔孫文程久相故特
新其祠又走驢子巷訪沁水劉生嘗念陽城張藐山先
生往矣孤孫澆澆期劉生郅問未值因入善慶庵其麓
如福緣尤整潔以歲之不登僧日三糜也遂過文峯寺
塔近舟宜興陳實庵具楚求詩勉成一首以書拙第錄
上兩淮運司故董仲舒相江都時定城東法雲寺故謝
安石宅並不及問

辛丑陰入新城之挹江門尋瓊花觀行久之入興教寺
有唐揚州察訪使杜祐景雲三年改處置使題名八角
石柱出即蕃釐觀勅脩今漢后土祠門以內無雙亭石
臺隆然枯株尺餘云故瓊花也揚州瓊花天下第一而
全椒縣西四十里瓊花池相傳王母侍女許飛瓊所植
隋大業初煬帝從江都間花之義移揚州后土祠中春
時盛開與后妃聚賞之唐宋嘗移汴移杭皆不活後遂
歸敦崇如故歐陽脩守揚作無雙亭紹興二十四年金
主亮入揚搗今而去有道士護其萌芽仍茂元順帝至
正間花萎其全椒原產處名六丈鎮元王本齋詩六

丈老人花滿頭一枝流落古揚州不知誰是我花手直
到而今香未收又仙史王興入秋長山見洞中千歲金
蟾蜍山頂瓊花本徑八九尺葉如白檀花如芙蓉香聞
數里今安得其種乎后土祠井宋賈涉守揚州有黃冠
乘雲而下入井中因鎚死目下視見一洞署曰玉勾復
使入則水漫不可尋矣仍出挹江門曰戶部鈔關橫舟
如潯墅非吾杭之柵流也其江東為平康所謂三分明
月在揚州也亂後色減揚州分野正值天市垣所以吳
地市易浩繁非他處比
壬寅雨衆禳於城隍廟從舊城安江門入廟內銀杏樹

園可四人神御硃牒批日月云捨身免快何達等二十
九名日候奉司登壇出入多有不到至倩人替代尤屬
非法除已往不究外云廟祝之誕如此舊城離邇遠
在新城下夜大雨中宵聞朱太史西河之慟尋夢應都
試幻甚

癸卯陰沁水劉氏來因寄陽城張連侯書親山先生孫
也

甲辰漫步入淨慧庵竹樹清疎不知為蓮社也沙門牧
塵道志方理懺度厄出而有儒追問則劍安上人也吳
興施氏子嘗寓吾縣杏花許氏園中各語舊事去之舟

移鈔闕前以權使赴飲不啟鑰也夜始月或以章臺微
通微雨後謝不任展

乙巳權使放舟牛泊寧海門入城出廣儲門沿西壕上
梅花嶺益積土也下為八角亭又過曹襄愍銑祠僅存
棹楔稍西細榆列隧試入之明督師太子太師兼兵部
尚書中極殿大學士可法史公墓承嗣男得戚泣血立
石間乙酉四月揚州陷有僧指公骸殞之墓草且宿不
勝飲恨入寺天寧寺故晉謝安墅義熙十四年梵僧佛馱
跋陀羅譯華嚴於此締造雄麗為淮南第一禪林銀杏
樹亦古因問平山堂道僧云不甚遠實銳度紅橋雖平

原曠寂實北邙也經法海寺蜀岡在曉足加捷入大明
寺古曰棲聖寺宋歐陽脩平山堂在寺前而廢右第五
泉渴飲不能味也唐劉伯易品其第五李秀卿又品為
第十二軒輊何常猶措大試案况余之舌端能定哉寺
枕蜀岡相傳地道蜀脈直揚子橋之新塔望揚州頗遠
勢不自己西入司徒廟蕭梁時如皋茅勝與友許祝蔣
吳相善共除虎患又密送王琳於朱瑒葬於鄴五人均
立廟隋追封司徒尸祝特感出問二十四橋云南且里
許以迷樓見奪又過大明寺東折觀音禪寺脩垣詰曲
大有致而門殿塵積為隋煬帝迷樓及摘星亭遺址其

地大儀鄉宋韓世忠敗金處雷塘二里而近隋有大雷
小雷之宮上塘長廣共六里餘下塘長廣七里今皆為
田今日雷陂距城西北十五里以足欲亟返過西門濠
水一勺貴勢家別業相望借流種荷所謂潁水清灌氏
興也江都地多陵阜故名廣陵城堅濠廣四野晏衍政
利步騎雄閭晉唐今西門摧頽豈史氏尚不逮李唐之
耶往反弔古益有無城之感

乙巳陰午發十五里揚子灣一曰茱萸灣故隋北宮也
四十里泊邵伯鎮晉太傅謝安出鎮廣陵築湖隄氏比
名伯甘棠焉因名湖與埭屬江都其東又陵湖齊建武

五年立表塘屯以灌民田西曰茆湖舊有斗門橋漕河
涸則引湖水濟運是夕江都劉孝廉彥祖元凱兄弟追
餞朱太史同飲始月別即兩鎮雖劇晚不克登

丙午雨揚帆十二里至三溝我舟檣折方捧梧聲震不
知其故時帆淪水之半驛卒六人適坐帆下無害旋霽
登枕樓望邵伯湖瀾瀾無際旁土橋廢十八里露筋女
廟年代里氏莫致女同蛟行夜止道旁蛟投田舍女竟
叢蛟吮死筋露後人哀之立廟三十里泊高郵朱太史
過慰

丙午辰刻微雨已刻發高郵五十里張家溝高郵有樊

梁虢社三湖袤三百里漕河高於田湖高於河弘治初
戶部侍郎白昂於高郵北五十里作外隄四十里曰康
濟河舟始免風濤焉意張家溝所發輟也二十里泊界
首聞有驛屬寶應落霞射水似石家紫障

丁未雜初號聞雨聲起見晴色自江都來水飈而山絀
民多苦舍田多汙萊魚蝦頗貴岸苗欲枯懼公漑病漕
誠河無全利也二十里瓦店鋪十過汜水亦小市也水
決復入為汜爾雅凡水之岐流後遂今水者曰汜西望
汜水湖東西衡三十里南北縱十里又連清水湖東西
衡十八里南北縱十二里游波決漕東以長隄三十里

槐角樓一隄如樓素苦沮洳始十里設刀犁列游徼之
士二十里泊寶應西門是日晴得月寶應又蝗并蝻禾
菽蒲葦甫寢總漕之舟至自江寧茄吹波沸津陸交驚
桐城王綱脩大初先泊不避絆紮其二人寶應城南北
各建戍樓碧霞行宮殊整麗碧霞元君即玉女也李謩
瑤池記黃帝建岱嶽觀遣女七人雲冠羽衣焚修以迓
西崑真人玉女獨修而得道早發不免登河濱高敞培
物潤茂後為崔瑄私第瑄六合尉也由瑄之間恒發寶
氣曰寶河縣西白水陂鄧艾置溉田萬二千頃宋元嘉
末決水以灌魏軍蓋今之白馬湖也十五里黃浦山陽

縣民稠禾茂十里涇河二十里平和鎮其土沃十里三
鋪十里二鋪十里一鋪泊楊家橋夜雨

戊申晨大雷雨十里泊淮安西門王編脩求解於總漕
沈文金登朱太史之舟留宿述仕路傾險洵過於太行
瞿塘也

己酉午刻同王編脩定爾語近事尋別循淮訪韓侯釣
臺石亭屹然旁即漂母祠楹帖曰世間多少奇男子終
古從無一婦人按古淮陰縣距今城四十里張正節史
記正義曰淮陰城北臨淮水昔信去下鄉而釣於此則
城下寄舍當在彼非今處

辛亥晨見巨魚美之舟人曰崇禎己卯江陰捕鱖魚
長四五丈剖腹有男子腰二十金布囊革履如故捕者
憐而殯之午入城至放生池殆百畝其形如玦繞以綠
楊平橋亦欄旁興隆寺文漪淪洄竚對久之暮啖藕云
產高郵味奪杭品

壬子西渡走田間麻菽被野間土人以高家橋曰相距
四十里漢陳登築堰萬曆九年增築漕運新河所取道
也田西盡為湖間周世宗開老鸛河於淮安城西或其
處乎淮人儉約故云淮貧濱河多苦舍或瓦其內蓋瓦
屋一楹歲徵一兩五錢苦舍止一錢五分凡兵船枹船

貢船其至絡繹負米肩負咸瓦舍之是任一瓦舍歲且
費數金故苦之以避徭也迨秦御史世禎痛裁之稍甦
癸丑雨

甲寅霽仍西渡望西湖色喜終迷逕而止

乙卯

丙辰

丁巳舟人再檣或貽朱太史雙鵲產海州者

戊午見鵲即大於鵲即褐色而斑又淮人沒各於本坊
土神廟饋飯三曰夕與其木主至城隍廟焚楮幣贄罪
而遂山陽胡給事之駿近卒子孝廉可及亦徇之楚人

尚鬼非耶午走西河嘴漢枚乘故里也市廛隱販亞於
維揚

己未莫飲於裘東皇舟中以東皇舅姑蘇游金陵昨至
有酒資雖持蟹螯未膏

庚申筆帖式喜福者滿洲人年十七入燕語貌同於中
土善國書給事總漕今晉理事官巨艦列幟同婦舍騎
而丹明璫錦被彼豈自知有今日哉筆帖式漢所云書
史也

辛酉昧爽同舟朱虞臣秀才沒於河上是日陰夜微雨
壬戌晴自舊入入於夾城有大池葭莢芄芃故陸通判

珣物胡給事據之今又不知誰屬矣經新城之南門度
高橋故東平侯劉澤清甲第一區門館壯麗曲渠高甍
劍衛駢列葢舊大河衛并凡民居數百家鳩工萬手窮
日無夜乙酉四月鍛金器若干備千節京餽俄遁去今
為公館漸黜剝是日適遇鍛工云遁之先吾私叩大奴
君侯計安出曰我公辦一走以全淮人因漸調其吏卒
而遁遂故道新城如野火城如蕪舊城猶不失為都會
也舊城經楚元王廟巽陋不可入莫微雨適江寧袍船
至勢張甚我移其絳

癸亥總漕貽朱太史螺鈿杯十二腰金刻玉髮翠毫丹

出維揚巧工直百二十金按唐大理蠻閭羅鳳陷成都
得巧工以歸習其藝至今重於滇南今維揚匹之矣晡
刻發舟折行經湖心寺水木扶疎聞山陽縣西北十里
故沙河來轉運使喬惟岳所開以避山陽灣清河口之
濤後蔣之奇又自淮陰開漕渠至洪澤湖入閘明永
樂十三年三月己丑平江伯陳瑄因舊渠疏之置牕曰
清江浦宋元運船止於滿浦閘更剝運入淮四里自
清江浦鑿渠二十里民甚便之凡行十五里抵板閘閘
廢前二十年舟內轉里許經樵郭公署而後出今移河
直達樵郭放舟出公署數百武駐河上之水心亭樵署

前石橋并廢今猶曰板閘非故道也宋元舊河湮尚隱
隱可見市居千餘家

八月甲子朔權親佐兵餉其法嚴加於潞墅維揚十五
里清江閘捷石畚土為楔橫板二丈有奇工曹司其啟
閉閉則下鑄啟則懸流 明清江浦戶曹二工曹一督
造糧船今裁戶曹之一併於工曹商舟由閘例徵鈔若
干梁頭若干給閘票限十月訖事如限內雖十往返無
限也泊月河

乙丑訪平江侯陳恭襄祠恭襄經畫漕運利賴百世其
疏清江浦引水由管家湖入鴨陳口達淮以免淮河之

患就管家河築隄十里以便引舟汲儀真瓜洲二壩潮
港之湮鑿呂梁徐州二洪巨石以平水勢築沛縣昭陽
湖濟寧南旺湖長隄開泰州白塔河通大江築高郵湖
隄隄內鑿渠亘四十里通舟南北自淮至臨清相水勢
高下立四十七閘於淮濱作常盈倉五十區於德州臨
清通州皆築倉規制詳矣廟貌巨麗今漸有泰離之色
祠左豐慈宮後殿據土阜上可眺遠轉南入番應寺雖
偉壯而諷唳寂然又過常盈倉北甚僅存數楹墉廣
廈倍於常制初江湖漸直之民輸粟淮上貯於倉候兌
漕卒曰轉運成化初漕卒直領粟州縣為長運矣淮濱

多衛民宿實巨室鱗次誠劇市也

丙寅己刻發月河河南民稠北地狹長十五里瀕外河
直王家營遵陸者渡馬屬宿遷時風利舟發內河十五
里興福閘尋望碧霞元君廟十五里通濟閘初陳瑄慮
黃水灌內河易於塞設通濟興福清江三閘慎其啟閉
三月初運畢即下鑰築土壩惟貢鮮船啟一閘二通濟
閘最險勢若建瓴各舟并力而挽又涯上繫輪絞之得
不遲墮過此人人色喜北岸甘羅城可周四里積沙與
城平四門塞其北餘不加鍵入其門無人門焉者內淮
安院河同知公署翼舍數家按甘羅說趙有功爵上卿

未相相秦者其祖茂也見呂覽與舊淮陰縣治相傳甘
羅築兩後土中嘗得小錢狀如鐘有篆文不可識俗號
甘羅城余意戰國遺堞諒不可接跡此舊縣必宋人築
城以禦金元者或云寶應有甘羅廟此其葬處又寧國
南陵縣北七里甘羅城甃甃甚工中可容數千人門址
略存又潁上縣東五十里甘羅墓何其城其墓之複也
舊縣西有千金亭北有韓信母墓與漂母墓相直稱東
西二墓舊縣南枚奉墓俱未及問甘羅城西數百武曰
滑口金龍大王廟最著靈無舟不禱優唱濯耳旁祠張
將軍勅封聖濟男 王系 平浪元帥大王職黃河

將軍職淮孫吳時張相嘗屯兵閭泉之青山禦海寇沒
葬焉建炎南渡虞允文與金人戰采石見大旂上題張
將軍姓字詢土人之從軍者得其神蹟進封為侯至景
炎元年勅封靈安王誕辰十月二十三日惠安令致祭
為常意即其神或別有所出未可知也淮清河濁而黃
強於淮隆慶初朱尚書衡分黃道淮力刷清口淮黃交
相為用天啟辛酉福清葉文忠向高應召道淮而膠得
張將軍風助見廟記中其大王始末碑刻曰謝緒晉太
傅安之十一世孫也安與王羲之好游上虞之東山從
子玄居上虞徙安溪之下壩灣今鐵塘孝女北鄉也宋

徽宗時謝達明遠提舉淮浙以蔡京柄國遂虛錢塘之
石門嶺及卒顯靈於鄉再傳生緒英邁軒舉望之巖巖
可畏髻鬣時與里兒浴溪上獲光明大珠一摩弄輒溪
雲滄集心人莫辨有神龍揚鬣雷電中似欲櫻珠去者
急以垢穢匿之晴霽如故緒視龍猶蜥蜴蜥蜴稍長更
折節就導性剛決遇不平事輒慷慨持論怒髮裂眦而
起以謝太后戚晚絕意仕進建望雲亭於祖塋金龍山
之巔題曰東山渺渺白雲低丹鳳何時下紫泥翹首夕
陽連舊眺漫看黃菊滿新溪鶴閑庭砌人稀迹苔護松
陰山徑迷野老更疑天路近蒼生猶目望雲霓性個儻

好施值歲饑多散錢穀賑下墟之餓人甲戌八月大霖
雨天目山崩緒泣曰天目主山也而崩宋其亡矣德祐
二年正月帝遣楊應奎上傳國璽降表元命宋內侍王
埜入宮收衣冕國籍寶玩車輅輦乘簿麾等物索宮女
內侍及諸樂官三月伯顏傳兇帝牽羊繫頸之禮趣帝
及太后入覲太后全氏與帝肩輿出宮度宗母隆國夫
人黃氏庶僚三學生等獨太皇太后謝氏以病留臨安
元人從宮人昇其牀以出侍衛七十餘人同赴燕緒大
慟題云立志平夷尚未酬莫言心事赴東流淪胥天下
誰能救一死千年恨未休湘水不沈忠義氣淮淝自媿

破秦謀苔溪北去通胡塞留此丹心滅虜酋莫笑狂夫
老更狂推輪怒臂勇螳螂三軍未復園中土萬姓空悲
塞北鄉動地聲名懸宇宙擎天氣概蕩邊疆忠心目古
人人有莫笑狂夫老更狂書畢赴水死苔水高丈餘狀
若龍鬥緒尸逐流而上經句不仆面目如生遠近駭以
為神祠葬祖塋金龍山之麓元末鄉落皆夢緒為神曰
中華有主矣黃河北流此其驗也 明初傅友德敗元
人於呂梁為神助云天啟丙寅加封護國濟運金龍四
大王華亭陳繼儒有傳余謂謝太傅以來歷唐宋殆九
百年至緒不當十一世明遠既徽宗時提舉歷德祐且

百餘年不當再傳生緒世次恐未核是日舟人致禱太史為告度焉

丁卯舟人云我舟昨歲膠於宿遷總督河道兵部尚書

兼左副都御史廣寧楊方興

清初解元

以宋口徐州北河決

潰及諸縣役數萬人治之十一月自清江浦南及淮安

楊家廟解凍趨役寅作西息稍不力岸兵即矢貫其耳

簿尉等被箠扶杖而立清江浦至清口三濬三淤或言

金龍神之靈不之信入廟不揖神附榜人言其謾以妖

妄再杖死最後輩裹其人沉于河三日不死泝流而上

始嗟異之時南河湯湯中流若界畫窪隆殊勢楊因約

神四月二十日開廟萬艘競濟因葺廟有加禮哺後放
舟渡淮河淮自泗州龜山縈回至此入於海出泗州曰
南河來入汴故道也出清口曰北河洶湧濤濤心曰廓
落十里泊清河縣縣廢無城儒學大成殿碧瓦猶壯有
大清小清二河俱泗水之委源出泗水縣經徐沛至縣
西北三义口岐流大者縣東北小者縣西南俱入於淮
是夕酒間聞越中巨室婦締詩社詞社衣飾詭異理鬢
訖復揉為亂絲垂垂紛紛竿不加首婢青衣持之衣長
內而短外遮襲遮短弓履窄特長若干寸綿貫其前
貫其直而不纖噫真厭妖也昔太康時婦人皆方頭履

與男子亡異今書之備五行志之闕

戊辰歌風且帆且絳十五里湖城十五里三空文十
里泊黃家嘴淮北蕭條瀕河為甚其墾田佃得其七業
主三之主出牛則五之更飯牛則七之河工郵使徭役
絡繹迫則流亡不顧虛墓故土曠而人僊以倣夜賈客
涕二人鳴金司漏

已巳行二十里桃源縣城負河之陰遙隄多節備河備
不得和采二十里泊滿家灣諺云黃河十里九灘故慎
所泊恐膠澁也長年常以竿測避明水明水者自中流
望兩涯隱隱如綫界也

庚午不風而絳二十里泊崖鎮居人數百家故中丞朱
笈裔孫貧矣笈享懋學累官右僉都御史巡撫大同自
揚州來十里一敵臺總督朱大典所築至於臺兒庄今
廢戎夜雨

辛未陰發十里三周十里古城有三義廟祀昭烈帝關
張及諸葛武侯晉石崇鎮下邳築城非三國時古城也
土人傳說立廟以傳奇桃源結義耳又宿遷有諸葛湖
每春陰嘗有城池觀市影徹水中俗傳諸葛孔明嘗屯
兵於此余意必魏之諸葛誕非孔明也誤古城以桃園
誤湖以諸葛俱耳食之過時風迅舟駛三十里白洋河

宿遷一大聚落也菽麥鹽豕實販相屬十五里陸家墩
墩里小河口南岸張將軍廟俗傳神為女弟出浴愈被
舟婦白氏溺之尸隨舟三日始出事泄氏論死神佐金
龍大王治水廟旁俱其裔或外出置嬰兒廟中嬉戲終
日不踰闕為冥護云實販恭事惟謹是夕野泊始見實
鴈

壬申行十里至宿遷縣西門登金龍神廟吾邑陳素庵
編脩時作碑記頌其攘夷功儒學在城外頗壯項王祠
臨河一矮屋宿遷古下相也項王廟間錫梧桐古蹟土
人云羽生於梧桐長於下相今祠陋甚抑為咸陽大報

凡耶縣北二里土阜曰馬陵山余前走淮揚城而揚之
金匱山淮之鉢池山世傳王子喬升於此俱土阜不以為山也
按圖經始得之縣西二里陳家溝河通舟今塞宿遷于
淮北為沃壤雞直銀三分餘不能枚數十五里泊董家
溝河至此束甚廣不數丈居民數十家並茆舍或露宿
土人方壅掃井護隄甚苦之夜雨按馬陵山凡中秋遇
月張幕其上月光照井一無所隔餘夕則否時有白氣
冲出

癸酉雨經通馬湖宿遷左路馬湖右張山湖路馬訛為
駱馬舊河直達邳睢寧靈壁歷呂梁徐州二洪自沛縣

北入魚臺今路馬湖合沂泗二水出董家陳家二溝入
黃河隆慶末尚書朱衡開新河風濤甚險屢損舟楫
尚書朱光祚又開路馬湖五十餘里費六千金有奇是
日舟行竹箭之中褰濡而挽繞三里

甲戌霽合四舟之力以挽一舟遞相代也繞三里泊舊
河口往河水漫今湍急昔人穿渠特犄曲以殺其悍一
忤風伯九上九下進寸退尺雖苦石尤而荻花夾岸綿
綿數十里從風猗靡挽不露而騎不露轡非所謂秋水
蒹葭也

乙亥左望路馬湖澄如淨練西南有山射目云邳州長

山陽山也 里馬湖店繞數家寄生澤國 里九龍廟
凡行三十里野泊夜月始寒

丙子行 里牛頭灣我舟折西北其西南邳州舊河也
東即魚頭集亦劇市是日行二十里野泊夜大風

丁丑早發十里馬莊集兩涘滔漭問之云本平陸受水
非河也枕人屢沒或涉或航賈人西指豐沛蕭碭云相
屬自改漉河徐邳寥寥雖從陸不之出又指北山突馬
者嶧縣也界鄒滕間益漉河始萬曆壬辰尚書舒應龍
開韓庄淮安城西北四十里韓信始生處己亥尚書劉
東星鑿良城邳州城北六十里癸卯李化龍訖工通二

百四十餘里今人不復知舊河矣是日行二十里泊二郎廟或問二郎神所出不能答史初再帆不半里風微戕寅迅帆四十里為夾界溝其左里餘劇市也河貫之崇禎

河淤尚書宜興周鼎自界溝鑿至徐唐口三十里市河遂廢今祠尚書傍立公館屬山東濟寧州又三里循王母山之左折十五里梁王城淮以北多灌荒汚淞始見山而喜梁王城遺址存余膚濤無所致意彭越昌邑人漢武更山陽為昌國有梁丘鄉梁丘故城在曹州城武縣東北三十三里越嘗漁鉞野澤中為羣盜陳勝項梁之起待戢餘澤間少年相聚百餘人請越為

長強而許之與期旦日出會後期者斬旦日日出十餘人後後者日中中越誅最後者一人設壇祭乃合徒屬徒屬皆大驚畏越莫敢仰視後為梁王都定陶疑此地為近度

閼水上溢舟輒踰而往十

五里橫林莊邛嶧分界處各置臺立表五里臺莊閼凡閼旁月河備水涸省繼板也是夕中秋節酒後步月遶山浮黛蒼花如雪一佳景也

己卯發十里候仙閼八里頓莊閼左岸隆隆東濤而聲壯八里丁家廟閼自臺莊以至濟寧二百四十里閼亦二十四地亢不瀦水特防以節之各專役啟閉校師由

開不失尺寸十二里泊范莊開一日萬年莊開

庚辰陰已刻度開以湍險倍力十里巨梁橋開泊夜雨
辛巳發十二里新開其成樓曰得勝臺二里停挽隄右
猷山雖卑不及登又二里野泊自臺莊來隄多石細碎
枳步益浚河出之本山脉也

壬午風利十四里韓庄開其旁微山湖為巨浸西則徐
州道也三十里赤山湖民居咸昔十之九山上木蘭寺
王播題詩處縣一曰滕縣郝山之陽木蘭寺紫呂蒙正
非播也

十五里彭家口

村多築樓四望備盜二十里夏鎮開西距沛縣三十里

南達昭陽湖亦大湖也工部部分司徐州者駐節夏節
鎮自新河或夏鎮為都會康阜樓會景門並雄踞河上
又萬安朱尚書衡祠華亭徐文貞階記之吳人周天球
書歲尚二祭微尚書人魚而市治矣時苦大水菽粟涌
直問沛人明時進士止張給事貞觀張郎中斗南夏鎮
河北即滕縣

癸未行六里楊庄間隱頗峻三十里宋家口開為獨山

湖即南陽湖也三十里馬家口隱且隘舟竟越之縣間

二十里馬頭關乘風宵行十里利建關十五里南陽鎮
鎮間孟氏所戒慎予取南陽者地產菽多大寶嘉靖末

朱尚書自南陽至留城開新河百四十餘里又六里野
泊是日見白楊初謂白楊柳類乃梓葉桐幹玉挺可愛
甲申曉望南陽溯煙帆微開翕殊狀四里叢林開元
延祐五年立亦小市五里魯橋開永樂十三年立西岸
月河千餘丈隆慶四年改正河複寬重析商賈奔騖開
下宣聖墨池俗名研瓦溝其水黑有古碑曰宣聖墨池
沙洲寺圍柳如幕七里師家庄開元大德二年立懸流
頗悍自韓庄來阡陌通波隄危一綫十里仲家淺開明
宣德五年立居人俱仲氏樓臺參差遭亂不畝屢寇至
阻水合拒勇哉其子路之遺子有家廟又勅建仲廟丹

樞紐垣不克展謁夕失南陽畫失仲廟二憾往矣釋於
何日五里新聞元至正元年立八里新店開元大德元
年立八里石佛寺開元延祐六年^立掘土得石佛像十二
故名^{濟寧}州^{濟寧}十里趙村開元至正七年立十五里泊濟寧
之南城驛間城南二十里鄭均庄漢時辭尚書不出明
帝東巡幸其舍意在趙村南驛舍整潔以總河楊公於
城署橋道無一遺者

乙酉濟寧州古任國也城在運河北岸泗水源泗水縣
陪尾山合魏庄等五十八泉至曲阜會沂雪二水及苑
之闕覺蔣詡七泉至濟寧又合洸水自天井開入運洸

水文之支也從通泗橋趨南門 明成化間水部郎新安畢瑜建橋坊曰濟川落成瑜子濟川適生登弘治壬戌進士綱脩視舊名若左券又水部治河日夜夢緋衣人稱宋都魁某云公隄太偏吾宮今不為處區區桐園將為行路余何水部寤索隄旁誌石得之改築隄而封其故墓而歲又夢其人謁謝願為公嗣詰朝次子濟時生登正德辛未進士都水郎中李太白酒樓據城上即南門之左翬革方新唐任城令賀知章所觴李太白者也樓並祠二賢宋咸淳辛巳正月壬午沈光記雄宕可喜篆書方石三面遂出南門稍左古南池即沆水經天

井間者有池植荷數畝唐杜甫與許主簿泛此有詩秋水通溝洫城隅集小船晚涼看洗馬森木亂鳴蟬菱熟經時雨蒲荒八月天晨朝白露降遙憶舊青氈詩見石刻上為公館堂揭曰汶泗通津進為君子亭荷池夾之其後脩除廣堂先朝詩君文諸石刻仍刷墨夫楊公身脩之不自為德務揚易代之烈其人豈易及哉南門即呂布射戟處有射戟臺東門外李太白浣筆泉嘉靖五年主事曰旆亭其上今並廢南池左曰觀瀾橋即龍神廟成化己亥建遂入清真寺西域人焚修處碑記云西域人亦古丁十三家來歸徙江寧後都人慕化齋集

分置各地故濟寧建寺從其俗也又引一統志西方有
聖人曰馬華 德者生而神靈長行其教化導四方其
塚芬芳生輝蓋其習事天不倣不屠今攷一統志不
見其說止云默德那國回回祖國也初國王謨罕謨德
生而神靈有大德臣服西域諸國尊號為別語拔爾猶
華言天使云其教專以祀事天為本而無像設其經有
三十藏凡三千六百餘卷其書體旁行有篆草楷三法
今西洋諸國皆有之又由陰陽星曆醫藥音樂之類隋
開皇中國人撒哈八撒阿的幹的思始傳其教入中國
視前說其人各異何也今天主教云出大兩洋歐邏巴

國卽所謂西洋諸國皆有之也第大同小異耳午過南
門在城闕元大德七年立又西北一里天井開元至治
元年立一云唐尉遲敬德建蓋會通河元人鑿以通漕
自濟寧至臨清凡四百里總河尚書及水部並駐濟寧
廂禁特嚴此啟彼閉一蓄一泄日不再啟又往制十月
望築壩吸河水於湖以便挑淺二月十日決壩通漕餘
舟毋越進各開勒石具在其後十一月不築正月遂開
今未審何如也天井開東報功祠祀尚書宋禮平江侯
陳瑄都督周長尚書金純侍郎萬恭重修詞記云唐武
德中尉遲敬德為盧龍節度使苦北地餉道乏絕乃開

呂梁夫呂梁者非孔子所舊觀龍門者尉遲公以其險
類真呂梁故藉名如東坡赤壁者云溯四百里而上及
任為天井關故尉遲公所建堅緻不敗庶石博厚專
車刻云大唐武德七年尉遲敬德建今治河者誤為元
人分水所建非也禹貢濟水東出於定陶後魏酈道玄
謂濟水當草莽之世川瀆枯竭不與昔同宋蔡沈謂今
歷下凡發地皆是流水世謂濟水經流其下然則今濟
水伏流不見惟汶水由濟河入海李夢陽曰濟之性勁
源於晉伏流地中乍見乍伏一支穿太行為百泉為衛
水一支為濟源出山東為七十二泉大拒天地勁氣在

山西人之性勁天下其鐵亦如之所謂并州剪刀者也
漢之性曲其流十里九灣郢沔之間渚為澤藪皆漢之
漾也語曰勁莫如濟曲莫如漢每試閘聲如雷足當瀑
布千尺

丙戌午過草橋閘元大德五年五月河閘三上下二新
閘俱天順三年改建中新至上新一里成化十一年立
是日發十里阻風泊船見菊馬場湖東西巨浸晚飲語
朱太史曰北魏酈道玄注桑欽水經稔山水源委非身
歷章亥之步也且道玄隔于江南何從考據今吾輩由
江淮入于河茫如也况耳目之外乎太史曰古人左圖

右書桑廊時圖書不乏較若列眉今若繪天下縣道于一幀標于丹黃加攷載籍自十得八九也

丁亥行十里耐老坡關是西北分路之會 明初大將

軍徐達開其堤洪武三年二月立關今廢二十里距野

間一曰通濟萬曆十六年^立距野縣在漕渠西八十里古

大野澤也關旁戍樓曰通濟臺十里小長溝五里則嘉

祥縣大長溝嘉祥古武城子游弦歌處大長溝春秋西

狩獲麟處舊有坊曰獲麟渡亦大聚落也有石堡頃者

析警九津要或戍樓或堡今戍桴鼓始息十里孫村二

里汶上縣寺前鋪關正德元年立十里南旺之關南旺

淮七十二泉跨寧陽濟寧間即鉅野大澤東涯也鉅縣
西南三十里宋時合梁山濶周三百餘里即宋江所據
梁泊也及會通河開畫為三中貫漕渠西曰西湖周九
十三里成化四年堤以石萬曆十七年加築萬二千餘
丈塼東西子堤千二百餘丈東曰蜀山湖周六十五里
嘉靖二十年築東堤曰馬踏湖周三十五里萬曆十七
年築隄三千二百丈有嚴子陵釣臺蜀山之下曰馬場
湖馬踏之下曰五莊坡湖通連無間蜀山在水中
望之若螺髻焉者獨也上祠聖母云伏羲氏母南旺湖
多菱芡魚鼈之利夏秋間荷花彌望中有閨亭高阜六

七春秋桓公十年會于閭是也魯隱公以下皆葬于此
至今水際時見煙雲樓臺之狀夜過柘林關十四里野
泊戊子曉走里許謁分水龍王廟尚王廟在溝渠西直
汶河汶自萊蕪寨子村至泰安州靜封鎮合焉名曰壑
汶西南流與徂徠山之陽水汶河合又西南流注沅水
其源有三自泰山之旁仙臺嶺一自萊蕪原山初元世
祖時壽張縣尹韓仲暉前太史遷源相繼言汶水屬之
御河北東阿至臨清陸運二百里為便後以都漕運剗
使馬之貞同源按視至元二十六年正月己亥肇工
明洪武辛酉河決原武漫及安山淤河四百餘里起城

村諸所陸運至德州永樂戊子命工部尚書宋禮疏之
于開河間至沙灣南比故河道北徙築二十餘里餘皆循
其故道濟寧則引泗沆汶水舊泉二百二十六新泉三
十六資運至沙灣則引黃河支流自金龍口者合之達
于臨清役濟兗青東十五萬人登萊願役者萬五千人
用老人曰英計築戴村壩五里遏汶勿東流從西南專
漚于南旺漕輓利之分水間北距臨清三百七十里地
高九十尺南距徐州四百里地高百十六尺廟在永寧
宋尚書禮本祠祠刑部侍郎泗州金純都督天長周鑑
忠濟寧州同知潘升正及汶上老人曰英時新築輓堡

以水淺上下閘俱閉待分水廟前泉溢始放舟晚過南
旺下閘同朱太史楸涯入分水廟及宋祠往返十里是
日發舟六里泊下閘硤或銅梨太史至以柿代云洪督
師南下先徵梨若干萬佳種為罄

己丑發十里開河閘元至正間立亦一聚落歲十月下
句為市集百貨萃焉迤北東平東阿壽張陽穀之交境
也有磚堡加以戍樓十二里袁老口閘正德元年立碑
磚堡戍樓如上五里劉家口閘七里靳家口閘正德十
二年立五里金家口閘並有磚堡時風利舟捷于奔駟
鄆縣范考功先文以愛歸值朱太史開北二里野泊夜

夢故劉念臺先生講博學審問節無示李札挂劍草醒
不及詳念于先生無素何寐以之也

庚寅曉霧二十八里安山關以安民山故名山在東平
州西南三十五里山半有寺上有甘羅墓安山湖在州
西十五里漕河西岸周百里環堤置閘以時蓄泄曰水
櫃水歲填淤民多焚牧其中萬曆十六年始復舊閘有
碑堡水始平其西壽張之梁山今日良山梁孝王嘗獵
焉改梁周二十餘里上有虎頭崖及古龕跡山南為古
大野澤禹所謂大野既潏也瀕湖荻絮蕭颯可念二
十里戴家廟閘屬陽穀魯僖公三年會于陽穀是也中

丞宋祖舜進士祖伊家閭旁築城立市雄于其鄉走河
置石牖虹卧雪奔嘗創于兵猶嚴鎮也

辛卯發二十四里折入五空橋橋對沙灣漢文帝時河
決酸棗潰金隄即此景泰四年徐有貞治沙灣決河命
曰廣濟渠渠口通源閘石隄二自大感應廟至沙灣修
百六十丈自沙灣至荊門驛脩一千九百三丈順治庚
寅九月河決儀封荊隆口壬辰七月決洙源口俱衝
會通河之長隄溺人畜亡算至今平陸被水或露確突
或露楊泉有江河日下之歎橋北六里入張秋城泊會
通樓北張秋古景陵州元為景德鎮設都水監弘治甲

實都御史劉大夏塞決河成賜名安平鎮專轄水漕其
城夾漕渠南北不閘會通樓下聯牆繫笮為浮渡河以
東東阿有金隄春秋魯莊公十三年盟于阿是也河以
西陽穀西南又壽張也齊魯之間縈河如帶禮結于張
秋其南濟寧其北臨清俱大都會也出東城南角門里
餘則吳季札挂劍臺正德十一年都水郎中關中楊淳
立祠祀徐君後為徐君墓壘甃焉元至正十三年西隣
康時記柏一株大于斗石刻季子挂劍徐君墓樹按徐
君墓一在泗州城北又古冢類高廣不宜一坏土意泗
州為確間挂劍草草長六七寸寸節葉挺而末銳形似

叙今水失之雖多宿草莽非也疇昔之夜劉念臺先生
所示殆其微乎余能疑夢不能疑草天且以草明季子
之心賢者固不可測矣又慶雲縣南八里季札墓土人
曰延陵臺邑人楊州鶴辨為季札之子墓季札適齊而
反其子死葬贏博之間春秋注云贏音盈齊地慶雲古
齊地也北齊悼陵屬河間大業初河間郡屬縣十三博
野居其一廣德間無隸隸魏博節度使其為贏博之間
無疑噫昔人辨延陵之墓而余不能辨徐君謗矣河洶
洶噉隄危及祠墓役者旁午趨之戰國時隄防皆去國
數十里以兩堤相去則不下五十里其水勢尚得往還

而不至迫隘不至大暴今之隄防近者數百步遠者不
過數里故其勢迫隘不得急決矣遂東城而北有祠翼
然臨河故分守東苑道忝議山陰陸景鄭先生夢龍祠
也崇禎初先生巡隴右遂寇殲于隆德稍北顯惠廟故
弘治時決口都御史劉大夏功成立廟其地祀東岳北
極文昌三神廟貌甚壯培土於後曰戊己山取土制水
之義即城壕也登其上東城中坎然窪然猶沈寗產蛙
也所可託足者無筴自夜雨

壬辰晴洪相國督師南下楚粵舳艫啣接不絕先一日
朱太史贊輶舟馳謁今艤俟其通焉相國家南安萬曆

丙辰進士崇禎庚午擢僉都御史巡撫延綏辛未晉兵
部右侍郎總督陝西三邊兼攝五省右都御史加兵部
尚書丁丑加太子太保己卯移薊遼保定總督辛巳督
師東援壬午松山陷沒先帝震悼築壇臨祭而哭賜
祭九壇贈太 謚忠烈廕恆有加順治甲申從入燕任
內秘書院大學士乙酉遷太子太傅兵部尚書總督江
南己丑加少傅兼太子太傅今南征朱太史舟晚發雖
忤風而流下改舟駛始用招招者直其木于艦首四五
人轉之以破浪也出城半里黑龍潭一日平河泉深不
可測大旱不枯相傳龍淵也嘉靖初郎中楊旦飲其地

欲涸而觀之水決未丰風雷大作舟皆覆沒楊乃懼而
祭之通張秋山遂絕望徒見馮夷之虐又八里泊荆門
上閘屬陽穀

九月癸巳朔始寒過上閘二里曰下閘又十里阿城上
閘亦美市鹽賈駑馬有土寨又三里下閘為小市黎棗
彌望十二里為七級上閘又三里曰下閘皆元時立
阿城閘齊阿大夫治處七級鎮古渡也十五里睢城縣
周家店閘元大德四年立今滄度月河十里故相國朱
文裕墓松楸不存且水及之三里泊李家務閘元元
貞二年立

甲午風利通濟橋開十八里永通開並永樂十六年
立經朱相國南園圮甚泊東昌之崇武驛晉開運二年
博州守羊 值河決城欲沒祝天投水死水患頓息民
德之立羊使君廟今水勢平之矣聊城春秋齊聊攝之
地秦置縣城東七里漯河俗呼湄河黃河之支流也穆
天子傳天子自五鹿東征釣于漯水午趨東門曰迎仙
水浸城隍琢築板橋二十餘丈石刻魯仲連射書處按
元國子博士吳師道注戰國策曰魯仲連說燕將下聊
城史不著年其書引衆腹之敗此事在其後故通鑑大
事記載于秦孝文元年當燕王喜五年齊王建十五年

自報王三十一年燕率五國伐齊閔王死襄王立三十
六年燕昭王卒明年惠王立越武成王孝王而至王喜
凡三十四年此蓋二事悞亂為一目燕攻齊止殺騎劫
二十五字或他年脫簡而初燕將止饒之十一字亦他
本所無也即單由即墨起四十餘城即復為齊不聞聊
城尚為燕守以齊之事勢豈有舍之三十餘年而不攻
單之兵力三十餘年而不能不與今日攻之歲餘不下
可見為此時燕將守聊城事也史獨殺破齊不下者聊
邑即墨策亦有三城不下之言果一時事則聊城亦為
齊守而非燕將為燕守者此悞曰聊城不下而引與莒

即墨亂也攷之單傳自復齊之後無可書之事齊襄公
十九年當趙孝成王元年趙割地求單為將次年遂相
趙必不復反齊矣郚城之役凡十六年單豈得復為
齊將哉此目歲餘不下之言聊苦即墨之混而誤指以
為單也夫仲連之言止謂累腹敗燕國亂郚城孤守齊
方僻攻勢將必拔其言初不涉潏襄昭惠之際所謂楚
攻南陽魏攻平陵閔王時楚臥淮北單復齊後益已復
之不聞楚魏交攻之事二事必在後也燕將被讒懼誅
連書亦無此意史又稱燕將得書自殺單遂居郚城尤
非事實齊前所殺燕將惟騎叔耳不聞其他此目騎叔

而訛也師道援據詳覈錄之以俟博攷東門以水不啟
緣板橋入于子門二里望獄門高廣數丈四層下石洞
四達勝甲齊魯間以杜工部望獄詩名近改為光獄夫
其指矣相傳出魯班子梁有遺斧方鑰之不克上又魯
連臺城西北十五里古聊城地高七十尺今城中亦有
之東昌饒棗黎今困水衆一石三金黎貴甚尋解維度
間又朱相國北園裏里許廢盡柳絲旖旎可想張緒當
年噫裴晉公牛橋庄遭五代迄宋不廢以朱氏全力獨
不鑄六州鐵惜哉十八里新閘二十里泊梁家淺棠蓋
聊城東岬界博平西岬界棠邑也梁家淺亦大聚落聞

尚書張鳳翔家馬今年八十一語云人以壽為榮我以壽為辱諒哉棠花在漕渠西南三十里博平縣在漕渠東岍四十里

乙未出梁家鄉開宣德四年立十五里土橋開成化七年立民多樓居並清平縣縣在漕渠東二十里齊貝邱地十二里戴家灣開成化元年立上即清揚驛民居千家今減過半二十里魏家灣開二十里南板開一曰雙潑開俱永樂十五年立二十里泊臨清州東關古趙東鄙也汶水自南旺分水來至此漸微通置閘出臨清之南板開始合衛水衛水出衛輝輝縣之百泉山即隋之

屯氏河水濟渠也煬帝四年自百泉東北引淇溢漳洹
諸水為大河賜名御河流八百里為元城又百五十里
當清河之南值臨清同汶水北達天津入海臨清大河
而城如張家嘉靖壬寅巡撫曹銑築萬厯 又築新
城共周四十里而舊城為繁

丙申游大寧寺二龍爪槐婆娑可愛方元煥書第一山
於石市駟雲集因一都會也晚出南板開可三百弓則
新開上開有金龍神廟門榜曰汶衛合流舟出口無牖
矣合流處有洲亘之曰中洲塢以石隄分建四閘而廣
濟橋其尻也賈販輻輳以上有觀音閣故地云觀音嶺

丁酉移泊戶部鈔關前聽買人登嶺受權有茶若干筐
列岍三日夜權使未檢閱毋敢室也客露寢以待偶入
三官神廟廟祝曹某父故明經遭亂家破聽其言惜甚
戊戌有朱氏招飲不赴沿河西岍以望衛水自西南來
稍清異于汶水按西岍十五里東漢安帝葬母耿貴人
處有池曰蓮花池無攷 己亥

庚子陰出西城渡河而東北走五里登永壽寺塔萬曆
癸丑建塔九級登其三亦遐隔百里矣遂憩一村菴僧
云洪督師舟遁敗鹽派各文武吏輸價若干故今鹽賤
辛丑重陽節午刻解維是日朱太史別御淮安之輕舟

云里阻風泊

壬寅發二十里發半邊店二十里清河縣油房齊貝邱
漢甘陵地城在漕渠西三十里又二十里臨清渡口驛
蓋臨清清河夏津之交也夏津春秋齊魯會盟之要地
漢鄒縣在漕渠東畔四十里又四十里武城縣趙平原
君封邑非子游所宰也古武城在今兗州費縣西北以
名同有弦歌書院有子游廟友人沈叔明謂廟下銅數
牛噫設求龍以祠李尉之虎求鳳以祠接輿之楚抑何
以應之哉武城人誤而又誤矣縣在河東畔乘月行二
十四里始泊御河尤縈迴倍於內河

癸卯發二十里武城之甲馬營驛一大聚落也與宋太祖所生地同五十里鄭家口縣城市尤劇二十里泊方家淺

甲辰雨發三十里故城縣古條縣膏池地也隸景州在河西所二十五里四女祠山東恩縣西北五十里恩縣春秋齊之里邱唐改貝州宋平王則之叛改恩州明降為縣其祠古安樂鎮漢歷亭傳順女家富亡子四女不嫁夫終養植槐表誓有龍瓜之瑞日拔宅飛昇仙去今女像最幘羽服補槐四以續其舊祓漏二十刻泊德州

乙巳晴發五里阻風而泊德州城北永樂初蘇緣國王
墓于遂入德州城屢中寇而瘠西門喧行往時漕艘所
萃也漢董仲舒讀書臺在德州正統六年知州韋景元
脩濬掘地得石刻曰董子讀書臺弘治間始祠西城上
振河間足快遠目蓋今衛漳黃河諸水合流自武城入
也申刻發二十六里深夜泊老君堂景州西南六十里
廣川縣董家里仲
舒下
惟處

丙午發三十里桑園景州東十里吳橋口縣在漕渠東二十
里又二十里景州安陵鎮民居三四百家有尚書曹思
誠庄曹故黨魏忠賢今尚以資雄東岸為東光土堡之

戎百人偶入安陵院有闍僧云嘗監園營同成國公朱
純臣象城伯李國楨今被縋六年矣問其姓不答俄風
恬行四十里為吳橋蓮窩驛月皎甚二十五里東光縣
在漕渠東岸三里漢渤海之弓高縣也十五里夏店二
十里油坊二十里交河縣泊頭鎮夜分乃息

丁未登陸泊頭鎮在交河縣東五十里嘉靖三十年築
土城隆慶二年易磚商偵輻輳南北大都會也河間院
河通判駐此有新橋驛未刻發二十里齊家壩二十里
薛家窩二十里馮家口十五里滄州碑河驛中夜泊
戊申早發見河南水鳥無萬數盤飛游泳色如白鷺而

小榜人曰魚鷹子意其為屬玉也野多貴人塚其著為
劉總督燕餘未詳又多廢園可想往日之盛今泊滄州
望瀛樓下滄州古渤海地城闔爭級可殿不可屨間滄
州舊城在今治東南四十里開元寺鐵獅二首昂一丈
身長二丈相傳周世宗駐此有治者鑄此贖罪嘗凡隱
盜七人捕者獲之晚行二十里興濟縣宋之范橋鎮也
在漕渠東畔城下巷無居人 明憲廟王皇后故里戚
郎為墟間石坊僅存河隄舊有柳數百株永樂間知縣
王彬以河決未及築隄民居盡沒痛不能救投水死尸
直漂入縣堂氏祠祀之曰神隄即河隄也又六里微雨

泊按九河故道謝肇淩曰馬頰河在東光界唐開元中
開新河胡蘇河東光縣東三里歷慶雲鹽山入海豐矣
河會于海漢志云其水散若胡鬚胡蘇臺縣東簡河潔
河在在滄州之臨津鉤鹽河在滄州東南經樂陵縣入
海太史河在南皮縣城北覆釜河在南皮縣南魯桓公
北伐至此繕脩史革名古史以章武有北史亭故曰南
皮以別之徒駭河在滄州廢清流縣西北二十里有隄
南津河在慶雲縣又在樂陵縣西三十里陸氏九河攷
謂鉤鹽在獻縣東南八十里餘八河皆在滄州南皮東
光慶雲之境而鄭道玄及宋儒程氏皆謂九河之地已

淪于海與書傳所載不同此蓋後世新河而傳以舊名
耳未敢信以為真也又一統志南津枯河自齊河縣經
禹城平原德州德平樂陵東北至海豐入海鈞盤自枯
河自德州經德平東北至陽信縣覆餗枯河自廣雲經
海豐縣南入海又濟陽縣東北至商河縣境有馬類河
目臆論之九河湮塞固矣未必俱淪于海黃流遷徙漸
失故道後人隨時易名不膠一蹟昭合為難況秦漢以
上記牒不考者乎海能淪亦能漲古瀕海之地所化為
廢宮鯨窟者無幾何安在九河之全陷也必不然矣寧
存之誤後

戎申發四里青縣在曹渠西岍春秋清國也東岍有土
堡以護漕漚沅河源大鐵山自代郡南城東經猷縣城
南十一里單家橋至青縣南金河口合衛河而北至天
津又縣南七里有盤古溝相傳盤古氏塚在水中石棺
鐵鎖繫之或隱或見溝北岍立廟四野沱漚望斷炊汲
誰其流之或河伯不盡任其咎三十里沱河驛潞水源
幽州漢光武遣吳漢等十二將軍追賊戰于潞東即此
今沱河驛北通曰潞河驛旁一大聚落也耗于屢寇其
西岍界靜海縣午晴二十七里唐官屯居人倍沱河者
三之青縣中條山唐陽城隱于此改滄州無此山而滄

州舊有條縣或曰向名之曰其山有懸崖瀑布數十丈如猿鶴聲西望山色又張秋來初見也前河蟻屈不易檝俄試俄輟是日竟檝四十里夜泊靜海縣無城在漕渠東岍縣西五里鳳凰臺以鳳集此有遺址

己酉發二十里則武清縣獨流鎮其人稠西巨浸汪洋按武清縣南三角浹周二百餘里古雍奴水也四面有水曰雍不流曰奴漢置泉州舊有城每雲霧朦朧漁人往見城形四起門巷宛然二十里甘家口二十里柳柳青地多柳市倍于獨流自獨流以來夾水盈盈似邵伯高郵道中也三十六里阻漕艘野泊是日立冬

庚戌發四里抵天津衛為三河下流沽水自北流水自
西北至衛城西北二里合流東注城左漕河自西又合
之流東南九十里入海尚貢同為遜河入海即此古曰
渤海亦曰東海也又曰北海楚子語齊師君處北海洪
景廬曰北至於清海故名北海以地連滄州亦曰滄海
金封王福滄海公是也衛地屬靜海縣城中不見井俱
外汲于河道易渾余舟處苦之鎮城百頃交集魚蝦蟹
鱗並賤

辛亥連大風而寒波濤怒立旅愴彌切

壬子風微是日間天津桃李頗果今秋後花而實

癸丑始霜余更舟以朱太史併裝前舟人施氏貸太氏
百金不能償獨之昧其券至感泣尋移檝登觀海寺

明成祖駐此兩廡作地獄變相未知閻羅何時獄空也
又慈濟藥王廟奉教農黃帝襲矣夜風甚

甲寅發十里丁字沽蓋丁字沽西沽直沽並為驢疏導
之處在武清境內河形三岔如丁字也凡海上傍水村
落俱曰沽河間府小流俱曰流衛河白河會于直沽相
榮入海土人呼直沽曰大直沽時江南民運白糧聚曰
丁字沽民呈戶部更剝船八百至通州糧廳又剝船百
至京師大通橋入倉潞河紆折過丁字沽以見天津城

也丹人指京師之西山雪凝矣十里尹灣午陰十里桃
花口十里蒲溝十里泊老米店

乙卯發十里楊村驛順天通判分淮之市屋整密俄雨
十五里遶大風向泊夜幸息

丙辰陰發二十里南蔡村一大聚落也十里黃家務十
里泊蒙村

丁巳便帆十里白廟十里河西務城從陸繞里許從津
不啻五里以縈旋故也夜雪

戊午度雄關泊白河西畔夜又雪白河在滹縣東四里
北出胡地經密雲通州又東南經香河入武清達于靜

海河兩岸俱白沙不生寸草故名

己未未刻雨

庚申午霽是日朱太史入都

辛酉晴自天津來恒陰又河始冰

壬戌

十月癸亥朔河水益堅度車騎

甲子入地藏菴值涿縣楊生今溫室遭亂僑居教授菴

中脩脯不贍問以岳文肅正後人云亦彫落所著類博

稿板頽廢矣菴地高今夏六月壬戌白河水溢及于垣

則自萬曆辛亥六月大水後再見也

乙丑

丙寅入觀音寺為市期村民趨焉進城北西門有雙榜
龍游津者前瀋縣楊生苦逢掖如罪罟此又侈之矣訪
白河講院內心極堂奉先師本主傾垣頽楹可念也南
蕩漚其門殆數百畝出朝陽門入關將軍廟視觀音寺
並嚴正談云南茶北酒南榆北寺良然廟碑二並未藹
鐘撰書將軍今封忠義神武大帝

丁卯 戊辰

己巳候車累日未集夜大雪

庚午晴

辛未晚登塗舍舟而徒心形俱適五里宿村舍故中丞
劉氏庄今隸僑人朱齋泉一斛雜寢坑上夜雪

壬申旦走雪徑衝寒策杖堅冰左顧俄見晨旭俯仰
徹恍焉開闢之初殊自失也枵腹甚乞餌分啖五里沙

河店瞰糜二器又三里龍泉寺縣朱義儒易我以蹇諭

御者善左右之風不可耐二十五里飯東鎮尋過鄆縣

其城一大周遭也縣東四里曰泗河以四水合流也合

注通州城東北入白河縣西南臨鴈臺遼主游獵處二

十里張家灣屬通州即白河下流相傳元時萬戶張姓

居此有城以護漕十五里宿通州胡氏以疲凍不善酒

通州古潞河即鮑邱水也舊為通惠河元至正間丞相
完澤議自昌平曰浮諸泉為渠貫京城出南水門抵通
州高麗庄便漕有五閘大通橋之東至慶豐五里慶豐
至平津上閘七里上閘至下閘四里下閘至晉濟十三
里晉濟至石壩十里河長百六十餘里 明時廢嘉靖
六年濬復每閘設吏卒共徒百八十人剝船三百艘各
領三十五金囊米通輸通州城北五里黃船埠黃船千
艘所泊也

癸酉仍策蹇二十里高米店

里星木廠周垣寬廣

路傾仄難步俄見碧瓦朱門者或遙指曰英王墓也

里入京城東便門度大通橋經崇文

元海岱門俗目之正陽門

門几十里至驢馬市寓舍晚同朱太史小飲今而後少
免於塗之人矣同計程四千餘里四閱月始稅駕禪裘
葛而過燕英子游侈矣而余謫昧不挾一帙雖好登陟
慕攷據芻蕘之口不甚核碑碣之詳不及搜覲面易失
經宿易忘余髮種種矣何能為漫託副車祇自愧耳又
同舟寧海萬生示天啟初紀鎮江入京之費日析里笑
僅三緡有奇相距三十餘年津塗艱劇費且十倍并識
之卷末不笑為蝌蚪前事也